

以下為於第四節發言，汪凡女士之講稿。請予存檔。謝謝。

主席：

- 我反對掠奪式發展大嶼山，賤賣香港嘅寶貴自然資產。強烈要求政府撤回災難報告。

-呢個報告提議喺大嶼山以東嘅交椅洲、喜靈洲填海，起公路連接港九珠三角，造地過千公頃，建造東大嶼都會，容納七十萬人。如果實行呢個計劃，東大嶼山、附近海域嘅交椅、喜靈洲，甚至坪洲、長洲都會受到影響，永遠喪失自然風貌。

-此外，報告亦建議喺大嶼山本島嘅小蠔灣、欣澳、東涌亦會填海造地、大肆發展。

-我想問一個最根本嘅問題，政府其實有冇人口政策？重複一次，人口政策？

-2014 年香港嘅人口喺 720 萬，家庭戶口數目喺 243 萬，而住宅單位數目就有 267 萬，證明其實有大量單位空置。

-香港現在的人口自然增長近乎零，就算包埋嗰每日 150 個我地冇得話事、冇得拒絕嘅單程證，統計署都只是推算到香港人口在 2043 年到達人口頂峯嘅 820 萬，跟著就會回落。

-現在新界各區都大興土木，鄉郊大受破壞，正在進行嘅發展計劃，包括新界北、洪水橋、屯門、大埔等等已經完全足夠容納呢 D 被逼增長嘅人口，點解仲要大肆發展大嶼山，無中生有做 D 大白象工程？

-唯一解釋就系政府其實計劃引入比呢 D 推算更多嘅新移民，大幅推高香港人口至九百萬、一千萬，跟著就話香港人冇屋住，系土地問題，要搵地起樓。

-世界上有好多人口得幾百萬嘅國家，譬如瑞士、瑞典，從來唔會藉增加人口同城市面積去發展經濟，但佢地嘅經濟發展也非常優秀。反觀嗰 D 只注重發展石屎面積嘅國家，就週圍都系冇人住嘅鬼城，造成極大浪費同破壞。

-起樓賣磚頭只可以賣一次，發展嗰 D 只計人頭不計質素嘅旅遊景點亦唔會賺到好多。將自己寶貴嘅自然財產永久破壞，去換取一次性嘅收益，或者不成比例嘅低收益，系 D 非常愚蠢又敗家嘅二世祖先會做。

-有份參與發展計劃、有地嘅人自然盤滿砵滿，袋袋平安，但你地有冇諗過，咁做會禍延子孫，愧對將來嘅世世代代？

-如果政府一意孤行，呢份報告就會系大嶼山、甚至週邊離島嘅死亡報告！

市民

汪凡